



Айгүл КЕМЕЛБАЕВА: «Жазушы ізгіліктің иесі болуы тиіс»

Сөз – қасиетті де киелі өнер. Шәкәрімнің “Сөз – құдайдан шыққан бу”, – деуі тегін емес. Ол ой-сананы имани қалыпқа айналдырып, жан-дүниемізді нұрландыра түседі.

“Дарын” мемлекеттік жастар сыйлығының лауреаты, жазушы, кинодраматург Айгүл Кемелбаева Тәңір сыйлаған сол сөз құдіретін өзінше қастерлеп, өзінше өрнектейтін жан. Қаламгермен әңгімеміз осы бір қастерлі әлем жайында өрілген еді.

– Айгүл апай, **Мұхтар Мағаун** өзінің “Тағдыр жазуы” атты мистикалық әңгімесінде жазушылық болмысты “Тәңір құты” деп таниды. Сіз қалай пайымдар едіңіз?

– “Тәңір құты” деген асқақ ұғымды көне замандарда жарты дүниені жаулап алған ұлы патшалар өздеріне теліп айтқан. Еділ (Атилла) мен Шыңғысхан тәрізді ерекше жаратылыс иелері қанды жорықтарымен әлемнің бейнесін түбірімен өзгертіп жіберді. Қазіргі заман көрінісі солардан қалған мұра. Мұндай шексіз билеушілерге ешқашан біржақты баға бере алмайтынымыз сондықтан. Ал сөз өнеріне келсек, мұның жөні бөлек. Пушкин өлеңінде өзін “властитель дум” деп атаған. Оған дейін осы текстес таңғажайып жасампаз идеяны грек-рим классиктері мен шығыс жүлдышдары көркемдеп айтып кеткен.

Жазушылықты адам тілеп ала алмайды. Ол Алла тағаланың мейірімімен берілген тылсым сый. Шашубайдың әніндегідей: “Болғанмен малға кедей, әнге баймын”. Байлықты аса іздетпейтін бір құдіреті бар болған соң Шашубай ақын осылай дейді. Оған шын лайық болу керек. Өнерін ұстай алмай қалғандарға құдайдың қаһары келеді деп ойлаймын. Өнерді әу баста арзан бағалап, пайда көзі не атак-данқ алу жолы деп адасып келгендер де өзінен шеберлігі асқан жақсыға қылған қиянатының сазайын тартып, түбі опық жейді. Өнердің киесі ұрады. Өнер – Алла тағала жаратқан көркемдіктің сырлы формасы. Құдайға құлшылықтың ұлықталуы өнердің астарында жасырулы. Жазуда жанды елжірететін керемет сүйіспеншілік жататыны сондықтан. Әдебиеттегі менің кредом: “Жүгірген жетпейді, бұйырган кетпейді”. Жазылуы нәсіп етілген шығарма сөзсіз туды.

– **Бұгінде осы бағзы мистикалық аңыз-әңгімелер жаңаша түрленіп, жаңа сипатқа ие болғаны байқалады. Бұл оның тым тартымды құбылыс болғанынан ба?**

– Мистиканың тым тартымды екені рас. Соны білген соң қазіргі американ киносы қансорғыштардан, сайтандардан романтикалық образ жасап алды. Бұл қатерлі адасу.

Зұлымдықты сұлуландырудың түбі неге апарып соғатынын болжau қын. Жазушы құдай сүйген ізгіліктің құлы болуы тиіс.

– Кейбір сыншылар прозаның кенжелеп бара жатқанын, поэзияның өскенін айтуда. “Қазіргі прозада образ жоқ”, дегенге саятын әңгімелер де естіліп жатады.

– Кім не десе де одан әдебиеттегі бар нәрсенің қадірі кемімейді немесе өзгермейді. Таңқурайды “мынау бөдененің жұмыртқасы” деп бергенмен, оның жеміс дәмі өзгеріп кетпесі анық. Бірақ атаулар дұрыс аталмаса, айналасындағы бар құбылысқа оның кесірі кем тимейді. Проза жүрттың бәрінің көкейін тесіп тұратын биік өнер деп ойлаймын. Ол – бір ұлттың тұтас образын жасай алатын кереметтігімен артық жаралған, рухани толысқан халықтарға тән көркем дүние. Қөрмес түйені де көрместің көрімен жүре бергісі келетін субъективті сынға өкпе жүрмейді. Негізінде көп жүрттың әдебиетті дұрыс тануы, түйсінуі кемшін тәрізденеді. Талғам мен өре жоқ жерде нағыз құндылықтар бағаланбайды.

Бізде орыс әдебиетіндегідей әбден жүйеге түсken, қалыптасқан эстетикалық танымдық артықшылықтар қүшайсе, ағымдағы прозаның бағы анағұрлым жанар еді. Оның үстіне қазіргі қалалық болып кеткен көшілік, тіршілік тауқыметімен тырбанған қазақ өзіне ең қажет адамдарды бағалай алмайтын халге жеткен. Бір ғана мысал: жыраулардың алтын тұяғындаи Эльмира Жаңабергенова тәрізді 18 түрлі мақаммен шырқайтын сирек әншіні продюсерлік іскерлікпен әлем сахнасына шығарып жіберуге бек мүмкіндік бар. Ол сонда қазақ ұлттың танытқан үстіне танытар еді. Бірақ, сирек талант иелері әйтеуір ел қатарлы қүнін көріп, биік шырқай алмай қор болуда. Шетелден шақырылатын әншілерге бір сәтте кетіп қалатын қаржыға-ақ қанатын қомдап, көкжиекке қалықтап кетер еді. Әттең, бізде ұлтжандылық жетіспейді. Бай қазақтар меценаттықты тар мағынада түсінбеуі керек. Мұндай жерде бақай есепке негізделген жіккілдік адым аштыра қоймасы анық.

– Тәуелсіздік кезеңіндегі қазақ прозасының үлкен бір жаңалығы – дін тақырыбы. Бұгінде исламдық сарын, мұсылмандық құндылықтар жас жазушылардың шығармаларына арқау болуда. Сіздің “Тобылғысай”, “Ғибадат”, “Қияда” атты әңгімелеріңіз бен “Мұнара” атты романыңызға да осы тән. Дін тақырыбына қалам тарту ненің белгісі?

– Еске түсіріп қарасам, “Ғибадат” атты әңгімемде: “Ортодаксальды діндердің көркем әдебиеттен алшақ емес екені мені ерекше баурап алды”, деп жазылпын. Расы сол. Орыс философы Владимир Соловьевтың діндердің мифологиялық табиғатын зерттеген эссеесін оқысаныз, әдебиеттің жаратылысында Тәнірге жалбарыну жатқанын үғасыз. Мұнда ежелгі гимндер, Жаратушы иеге мадақ жатыр. Шәкәрім қажы: “Сөз – құдайдан шыққан бу”, десе, бұл-дағы христиандық ілімнен алшақ түспейді. Құллі діндердің шығуы бір. Мен атабабамнан қалған әдет-ғұрып, салт-дәстүр, ұлттық дүниетанымның құлымын. Исламды о баста біздің салт-дәстүрімізді бұзбай, лайықтап кеткен әулиелерді пір тұтамын. Біздің далалық болмысымыз орасан бай, құпиялы қатпарларға толы болғанмен, қазақ жер бетіндегі ең санағы айқын халық. Ауыз әдебиеті керемет болатыны сондықтан. Осындай ұлттан шығып, бар қазынаны ұқсата алмасақ, Құдай кешпейді.

– “Қоңырқаз” атты алғашқы әңгіменің – фантастикалық антропология. Мәскеудің М. Горький атындағы Әдебиет институтына түсуінізге септігі тиген де осы

туындыңыз екен. Прозадағы көркем антропология мен фантастикалық антропология туралы не айтасыз. Олар өз бағасын ала алды ма?

– Мен Мәскеудегі жоғары оқу орнына түсер алдында КазГУ-дің журфагында 3 жыл білім алғанмын. Яғни, 8 жыл студент болғанмын. Менің екі бірдей жоғары оқу орнында студент атануыма Сапар аға Байжановтың ерекше көмегі тиңді. Ал осы «Қоңырқаз» атты әңгімеммен Мәскеудің М.Горький атындағы Әдебиет институтының шығармашылық конкурсынан өттім. Конкурстан өтпегендерді қабылдау емтихандарына жібермейді. 1989 жылы осы институтта дәріс оқып жүрген, жазушы Роллан Сейсенбаевтың жазған хаты менде сақтаулы тұр. Ол: “Мына әңгіменің қазақшасын жібер”, деген еді. Ал мен конкурс үшін орысша аудармасын жібергенмін. Бірінші курста семинар өткенде шығармаларымызды топта талдайды. Орышамның нашар кезі. Әйгілі орыс жазушысы Андрей Георгиевич Битовтың семинарында оқыдым. Ол кісі “Қоңырқазым” магиялық романтизм деп баға бергені жадымда. Расында оның идеясын Ханс Кристиан Андерсеннен алғанмын. Әңгіме эпиграфында мұны жасырған жоқпын. Әдебиетте қарызыға алу тым көнеден келе жатқан құбылыс. Мықты жазушылар одан сүрінбейді. Нашарлары үқсатпай бүлдіреді.

– Ал қазіргі қазақ прозасындағы тотемдік ұғым жөнінде не айтасыз...

– Тотемдік ұғымдарды өте жақсы көремін. Әдебиеттің көшпелі алтыны. Овидийдің “Метаморфозасын” енді оқи бастадым. Классиканы қайталап оқи беру керек. Менің “Қоңырқазым” фантастикалық әңгімeden гөрі осы Овидий жырлаған құбылударға келетін сияқты. Бұл әңгімеме тура 20 жыл өткенде киносценарий жазғаным жайдан-жай емес. “Жамбыл” журналының 2010 жылғы 3 санына белгілі жазушы Несілбек Дәутайұлы басты. Қобыз бен диуана сарынын қостым.

Әдебиет уақыты өтіп кетті деген ұғымнан алшак. Тобық Жармағамбетовтің “Отамалы” атты повесін қыста оқып шығып, ерекше сүйсініп, қайран қалдым. Овидийлік, жер мен көкті біртұтас орайтын сөз құдіреті бар екен! Қазақта есімі көп атала бермейтін марқұм жазушыларды қайта актару, жарыққа қайта алып шығу әдебиетшілердің парызы. Солай етсек, шынымен көсегеміз көгереді.

– Қазіргі қазақ жазушылары киноға ерекше мән беруде. Экрандалуға үміттісіз бе?

– Мағжан Жұмабаевтың “Шолпанның күнәсі” атты классикалық әңгімесін 2005 жылы кинорежиссер Болат Шәріп экраннадады. Менің бұл фильмге сценарист ретінде атсалысуымды ғайыптың күші, Құдайдың бұйыртуы деп қабылдадым. Болат аға Мағжан туралы екі эссеңді оқып, газет арқылы тауып алды. Ұлы ақынның рухы риза болсын. Қазір бірнеше сценарий менде даяр тұр, біреуі өз әңгімем бойынша, екіншісі Әзілхан Нұршайықовтың “Мәңгілік махабbat жыры” романы желісімен. Ушіншісі “Ер Төстік” ертегісі бойынша анимациялық фильмге сценарий.

– Қоғамдағы саяси оқиғаларға қалай қарайсыз?

– Атам Кемелбай Насырханов 1937 жылы халық жауы ретінде атылған. Репрессияның зардабы, уыты оңай тарқамайды. Үрпағының өмірін улады, санасында қалып қояды, тез түзеле алмай, зорға ес жияды.

– “Қазақ әдебиеті өзінің ұлттық мазмұны арқылы әлемдік әдебиетке шығады”, – дейсіз. Үл ретте әлемдік әдеби үдерістердің ықпалы мен әсері қаншалықты?

– Расында мен ой қайталап тұрмын. Негізінде оны кеменгер Гете айтқан, ол “әлем әдебиеті” деген тың терминді 185 жыл бұрын алғаш енгізгенде жаңа дәуірдің сипатын болжап айтқан Әулиелік сөз. Әлемдік ұлттар туралы: ай астындағы айышылық дүниеде бәрі ескіден қалған. Постмодернде қазір жансыз көшірмелер қаптап кетті, нашар клиптері бұраңдаған әнші қыздардың макияжы бір-бірінен аумай қалғаны сияқты біртекті. Пысық адамдар жасайтын коммерциялық әдебиет. Қөшіліктің шала талғамына сай тоғыта беретін романсымақтардың бір әрпін оқып әуре болмаймын. Біреуге еліктейтін кезеңнен етіп кеткенмін.

– **Әдебиеттанушы-ғалым Айгүл Ісімақованың** сіз туралы: «Айгүл өз туындыларында саналы түрде европалық, мифтік есімдерді де кіргізіп қояды. Онысы эксперимент болғанымен, өте сәтті пайдаланылған амал. Өйткені, дүниежүзілік әдебиетті біле отырып, сол деңгейде ойланған отырып, қазақша стильдік тәсілдерді дүниеге әкелуде», деп айтқан пікірін оқыған едік. Үл ретте сіз: “Мен дүниежүзілік әдебиетті біле отырып, қазақша стильдік тәсілдерді дүниеге әкелдім”, – деп айта аласыз ба?

– “Майя” атты повесімде біраз мифтік образдар болғанымен, мен негізгі қоректі өзіміздің халық ауыз әдебиетінен аламын. “Ер Төстіктің дүниеге келуі” атты әңгімемде баланың аты бұлай емес, бірақ астарлы түрде үл бір әулеттің құриын деп барып, аман қалуы, қайтадан жаңғыруы болып табылады. Магиялық проза деген осы. Ұлттық нышан. Сөздің астральдық қасиетін ұққандықтан, жазушы ретінде маған миллиондаған доллар табыс көзін әкеледі десе де, зұлымдықты әрдайым клондап отыратын қатерлі сюжеттерді жазбаймын. Батыс мәдениетінің рухани тоқырауға ұрынып, азғындықтан тұншығып жатқаны сондықтан. Баяғыда ақшадан қиналып жүргенде бір қызық ұсыныс түскені есімде. Қаптаған сары басылымдар үшін порнографиялық дүниелерді бүркеншік атпен жазып тұруға. Қаламымды, қазақтың ардақты тілін сонша қорлап, былғайтындағы қара басыма не күн туыпты?! Ал балаларымның ырзығын Құдай өзі береді.

Шетелдік проза туралы айттар болсам былай. Мәскеудегі Әдебиет институты 5 жылда антикалық әдебиеттен қазіргі заманға дейінгі ең мықтыларын теріп оқытты. Алайда, білім деген ұғымның өзі салыстырмалы әрі шартты нәрсе екенін мойындауымыз керек. Сонын әдебиет тұңғиық, терен сала. Оның бәрін түгендеуге бір адамның ғұмыры жетпейді. Бірақ Мәскеуде ерен оқымысты, ғұлама академиктердің алдын көргеніме қуанамын. Шетінен өте зиялды, ерекше әділ, қарапайым жандар. Білімі өскен сайын адам баласы зиялды бола түсің заңдылық. Ол өйткені, надандықтан ажырайды.

Стильге келер болсақ өзімді-өзім қайталамаймын. 12 әңгімем 12 түрлі, үш повесім үш алуан. “Тобылғысай” атты әңгімемде ежелден бар тәсіл: “әңгіме ішіндегі әңгіме”. “Ғибадат” атты діни әңгімемді көбі қабылдай алмайды, сонда біраз стильдік тәсіл бар. “Мұнара” атты шағын романымда зоологиялық проза тәсілін қолданым. Мен үшін зоологиялық прозаның ең мықты өкілі Герман Мелвилл, оның “Моби Дик немесе ақ кит” атты романын қайталап, сүйсіне оқыдым. Хайуанаттар этимологиясына асқан сүйіспеншілікті Мелвилл үйретті. Қазақ ауыз әдебиетінен бері хайуанаттар туралы анималистік проза дамып кеткен. Тегінде прозаның мүмкіндігі поэзиядан гөрі шексіз.

– Тәуелсіздік тұсындағы әдебиет несімен артық? Әдебиет сүйгіш қауымға қандай жаңалықтарының, тосын сыйларының бар?

– Тәуелсіздік тұсындағы әдебиетте цензура жоқ. Қазір халтураны толтырып әкеп берсең де баспалар ақша үшін баса береді. Сондай-ақ, нағыз шығармаларға жол ашық. Сонын, бұрын үлкен буын кіші буынға ептең үстемдік, әлімжеттік танытатын еді, дер шағында басқызбай қоятын. 1987 жылы жазылған “Қоңырқазымды” газетке бастыра алмағаным ойымда. Атын айтпай-ақ қояйын, бір жазушы маган: “Жап-жас болып неге мұндай әңгіме жазасың? Бесіктен белің шықпай тұрып, классик атанғың кеп жүр ме?!” деп ұрысқаны есімде. Шынында, ол кісінің не айтқысы келгенін түсінсем бұйырмасын. Қайдағы классик? Әдебиетте аты жоқ, 22 жастағы адам қалайша өзін классик сезінсін?! Уақыттың еншісіндегі дерексіз ұғым үшін алдын-ала бас қатырудың қажеті қанша! Классик болу, болмауды ойлап отырып жазбайсың ғой. Оны бір Құдай біледі. Мен ол кісі іштарлық қылды деп түсіндім. Сол әңгімемің ең таңдаулы институтқа түсуімे септігі тигені рас. Литинститутты ғұмырында аңсан өткен жазушылар қаншама. Егер Құдай оны маган бұйыртып тұрса, бұл бір белгі, есте тегін емес. Әңгіме 7 жылдан соң жарық көрді.

Баяғыдан жасырып, тығып, ешкімге көрсетпей жазатын ғадетім әлі қалмаған. Мамам ауылда нан илегенде көз тиеді, сұқтанбандар деп бізге көрсетпей қоятын. Сол сияқты жазуда ерен нәзік дүние. Шығармашылыққа ерекше аңсармен, асқан сүйіспеншілікпен қарайтынымды айтсам, сол жетіп жатыр.

– Қазақ әдебиетінің ақсақалы Герольд Бельгер шығармашылығыныңды ерекше бағалады, оған әбден мактанды болады. Қазір мемлекеттік тапсырыспен қаншама еңбектер жарық көріп жатыр. Неге ұсынбайсыз? Бұл орайда, Жазушылар одағының қамқорлығы қаншалықты?

– Қазақстан Жазушылар одағының төрағасы Нұрлан Оразалинге алғыстан басқа айтарым жоқ. 10 жыл бұрын жазсам деп ниеттенген «Көкенай мен Қалқаман» атты эпикалық прозам былтыргы қарашада «Қазақ әдебиеті» газетінде жарық көрді. Жаңа кітабыма сол да енсін дедім. Ол ойшыл ақын Шәкәрім Құдайбердіұлының әйгілі «Қалқаман-Мамыр» поэмасының жөлісімен, нәзирашылдық дәстүрде жазылған. Осы идеяны берген Көкенай батырдың ұрпағы Әнуарбек Исаханұлы. Мен әңгімемді жазып біткенше ол кісі бұл фәни дүниеден өтіп кетті. Әңгімемде екі эпиграф бар, сюжеттің негізгі иесі Шәкәрім қажыдан алынған бір жол өлең және Әнуарбек ағаның рухына арнадым деп көрсетуім сол себепті. Бұл өмірден алынған деректі әңгімеде кілең тарихта өткен адамдардың аттары аталады.

Әңгімелескен Ләйла ЕДЛҚЫЗЫ.